

青浦縣續志附編

按江南通志徵訪章程所徵人物沒於辛亥後者列入附編茲循其例另編一卷附於續志之後斷自民國七年則以續志徵訪止於是歲故而編次先後則視下列諸人之歿年

朱 煥 張心鏡 方存基

張光贊 姚葆辰 鄒 銓

夏瑞芳 陳秉鈞 黃恩煦

方 瑰 周其照 王鴻鈞

宋思劬 孫起榮 胡祖謙

陳承澍 顧家振 席 淦

熊祖詒 陸廷楨 錢步瀛

許啟琳 李成仁 黃 封

葉其驥 楊祖恩

青浦縣續志

附編

朱煥字述齋曹娘廟人性行敦樸不輕然諾早歲讀書不成顧嚴於教督子金聲孫寶鑫卒獲先後隸名學籍宣統紀元煥年八十有五邑人葉其驥王鴻鈞臚其事聞於提學使樊恭煦給耆德引年扁額又四年卒

張心鏡字鑄江性伉直豪於飲與人交能以肝膽相示文章情辭斐亶德清俞樾深賞之光緒壬午舉人壬辰成進士用知縣籤分甘肅總督陶模知其才委甘新總糧臺文案綜覈謹嚴歷署高臺皋蘭張掖補正寧中衛署階州靜寧河州兩充鄉試同考官心鏡居官廉正有幹略能卹民隱張掖有沙壓地萬畝屢請免徵而絀於部議乃捐廉八百金轉圜之遂除秕政中衛有七星渠前任某創築大壩捍山水顧工當河衝需帑鉅萬有典史為某所暱委以工務詬弊叢積眾洶洶

滋事心鏡至馳赴工次博訪輿情詳求事實行就理矣會某已超擢藩司齟齬之遂徙調由是渠工益弛鬩闕無虛歲總督升允知非心鏡往不可乃檄回中衛任事始定河州回民激變當事張其詞乞省派兵心鏡奉檄單騎往撫皆懽汴受約束武昌事起秦州獨立心鏡說提督馬安良撫定軍心地方賴以安謐解組後卒於蘭州省寓

方存基字伯堅居東門內業典質早孤事母孝母疾侍奉湯藥衣不解帶者彌月尤篤友于家庭雍睦人無間言弟婦早寡妹適人他離存基皆月賙之

張光贊字可良附貢生章堰人長會計測算之學同治初襄辦清丈旋挾其術游兩浙所至咸優禮之浙撫楊昌濬督修海塘延光贊測南北二塘南塘自蕭山臨浦至慈溪楊浦長

青浦縣續志

附編

二

七萬三千三百十四丈九尺北塘自錢塘獅子口至蘇省金山縣長五萬七千二百六丈六尺八寸用五里開方法繪成全圖勒石置海寧海神廟光贊賓各州縣幕數十年司出納纖毫不苟晚歲歸與宋思劬姚葆辰等青溪九老會卒年八十有二

姚葆辰字苻田歲貢生儀觀魁偉內行謹飭父鈞殉咸豐庚申之亂骸骨不歸葆辰痛之每與親故語涕浪浪然家貧事母孝更亂離藉脩脯供菽水課徒垂五十年裁成甚眾葆辰賅洽羣經喜研小學士子有置史漢書者多乞爲句讀丹黃精審奉爲善本宣統元年舉孝廉方正卒年八十有三著有易經心解禹貢九江攷周官析疑篇

鄒銓字秉衡章練塘鎮人浙江省立高等學堂畢業生嘗主

天鐸報筆政少孤貧爲人沈靜好學深思清季吏治日汙銓嫉之又年少氣盛故其議論多激切時清廷籌備憲政地方自治章程有并區之議銓以鎮離元和吳江遠宜割隸青浦上書當道卒依其議行焉銓病羸喜爲詞章瞻逸富麗然俯仰身世流連景光歛歔欲絕尋咯血卒年二十有六著有流霞書屋詩稿

夏瑞芳字粹方南庫人幼貧嘗寄食戚家年十一隨母至上海入基督教會肄業清心堂遭父喪輟學爲同仁醫院學徒尋棄去更人文滙字林等西報館爲排字所獲漸豐光緒丁酉就上海創立商務印書館而已則赴日本攷察印刷業既歸會國家行新政廣設學堂因延聘專師編輯大小學堂教科書並搜羅新舊圖書印行國內初基本僅四千金經營十

餘載擴充至數十倍分館遍於全國我國印刷業規模之鉅瑞芳以前未之有也先是瑞芳以基本絀嘗與日商合資旣念洋股羸入則利源外溢乃次第收回之卒爲仇家嫉視狙擊而殞瑞芳狀貌偉然秉性仁慈好爲義舉殯之日中外人士執紼者數千人多有隕涕者紹興蔡元培爲之傳

陳秉鈞字蓮舫附貢生候補刑部郎中珠里人祖燾重游泮水父垣庠生皆工醫秉鈞承世業精習經方洞曉脈理時有國手之目四方求診不遠千里而至甚有舍館以待者光緒戊戌德宗不豫特詔徵醫疆臣多承旨薦辟江督劉忠誠坤一鄂督張文襄之洞並以秉鈞應所定方獨出諸醫右嗣孝欽后病復徵之先後凡五召皆稱旨許爲良醫命在御藥房審查方藥每退直輒令內監扶掖賞賚銀兩緞疋甚厚秉鈞

性樸實不喜衒俗遇病家要診輒徒步不御輿貧者卻其財物或延登漁舫弗拒也與武進盛旭人杏蓀父子交最密盛氏有別業在滬嘗推宅以舍秉鈞人以爲美談卒年七十有八無子以弟秉鐘子承澍承濬爲後所著醫言燬於火今所存者庸庵課徒草紀恩錄數卷而已

黃恩煦字淵甫原名爾澍家麟子光緒辛卯舉人少承庭訓肄業龍門書院治經貫漢宋諸儒解說並挈覈性理音韻之學俱有深造院長興化劉熙載深器之郡守陳適聲創建融齋書院聘恩煦主講席又經理雲間書院及育嬰堂事務皆詳慎有則余山東麓有鄉賢陳眉公白石山房遺址將爲教堂所侵恩煦詣縣請勸勒石卒獲保全恩煦性懇摯與人交相浹以誠然望之儼然邑人士無不以道學目之著有扶雅

青浦縣續志

附編

四

堂詩文雜鈔

方瑰字耀南方家窳人也事母孝母病兩割股肉以療親督學林天齡獎苦行純誠額歿於民國三年年七十七

周其照原名英字壽陔別號疎庵增貢生性明寤以雅量見稱工

書能撫晉唐以來名人十八家手蹟又精篆隸兼善鐫刻偶作繪事綴以小詩短跋風趣獨絕遵義黎庶昌之奉使日本也其照隨之東渡東人士愛其書有願執弟子禮求指示點畫者屢遊廣陵一赴粵嶠所至以詞翰爲交游推重晚年佗僚失明作老馬歎蓋自況也

王鴻鈞字申蕃增生貞亮篤素與人文溫恭盡禮子家霖甲午舉於鄉嘗宦游宣南鴻鈞不樂就養日惟聚生徒講學至老不倦泊如也宣統元年與姚葆辰同舉孝廉方正著有小

輞川居士吟稿卒年八十有二

宋思劬字益三少孤貧以縣胥起家性行誠篤任事有毅力  
邑令林德泉特拔之道光三十年襄辦水災後荒政力洗前  
令毓慶任時弊混一本實心多所贊助光緒中董邑廟事先  
後規復堂宇及靈園勝蹟又督修城垣橋梁道路施捨衣米  
棺槨皆不辭勞瘁眾望翕然思劬老耄而神明不衰步履甚  
健戊申赴婁縣楊葆光海上千齡會庚戌赴提督劉光才雲  
間九老會皆以齒尊迭膺首座卒年九十有三

孫起榮字潤山國學生居黃渡爲人忠信篤實董鄉政三十  
餘年凡辦理平糶開濬河渠修築街道添設路燈率廉貞自  
矢一秉至公有司多器重之里有紛錯事得起榮片言而決  
歿於民國四年年八十有一

青浦縣續志

附編

五

胡祖謙字端臣原名揚祖承頤子光緒乙亥順天舉人由國  
史館謄錄保內閣中書考取軍機章京供職十餘年小心慎  
密累保至戶部郎中庚子拳匪之亂聯軍內犯樞垣事繁重  
祖謙旦夕僂直不遑問家事兩宮西狩間關赴行在辛丑回  
鑾敘扈從勳以道員用壬寅簡授江西吉安知府時朝廷方  
厲行新政諭各省興學堂設巡警祖謙手定章程頒行屬縣  
秩然有序丁未署廣信調臨江擢河南河陝汝道陝州衝要  
多盜患祖謙禽渠魁置之法四境肅然宣統辛亥鼎革解組  
歸築室郡城觴詠自遣書法秀勁終其身揮翰不倦卒年六  
十有五

陳承澍字挹霏幼穎異工詞章文名藉甚光緒辛卯優貢朝  
考一等以知縣分發浙江補寧海厯署富陽象山等縣丁母

憂去職服闋洊升知府承澍機警多謀善應變官富陽時鄰縣新城桐廬分水有愚民揭竿仇教承澍率小隊馳赴富新接壤之青雲橋鎮鎮懾之並詣新城會謀防堵以是兩縣境內教案帖然大府以承澍當事急不以越疆出位爲嫌稱之曰能宰富三年興學堂治盜賊辦積穀課農桑主修縣志去官曰士民咸德焉著有來蝶軒詩文稿

顧家振字韻笙幼從從父山喬習婦人科精其術顧氏業此者五世矣名噪甚與里中朱氏瘍科吳氏小兒科鼎峙而三皆觀音堂良醫也家振好吟詠著有燼餘廬詩稿

席淦原名裕宗字翰伯珠里人以諸生畢業上海廣方言館保送京師同文館從海寧李善蘭習疇人術窮其奧蹟旋繼善蘭爲天文館總教習講授垂三十年造就海內英才甚眾

青浦縣續志

附編

六

累保至兵部郎中截取知府光緒己亥試經濟特科南皮張文襄公以淦名列薦剡謝不應壬寅直督袁世凱奏調北洋差委歷充官銀號籌款局淮軍銀錢所總會辦稽核精嚴顧性恬退又目擊時事日非未幾卽乞病歸淦爲人溫良謹厚交友接物一本於誠身雖困窮而取與之間一介不苟退休後足不入城市焚香埽地蔬布以終年七十有三邑人私謚曰貞獻著有幾何學算書數種庚子燬於亂惟抱膝居士詩稿一卷藏於家

熊祖詒字鞠生戶部主事其光子少孤受季父其英教彊學懿文器宇恢廓弱冠游京師光緒乙亥登順天乙榜逾年成進士選庶吉士從其英協振河南庚辰散館授直隸涑水知縣改安徽旌德時有暴民高一峰謀不軌聚眾劫署祖詒率

兵弁力禦次子宗鼎殉焉卒銘得首逆及黨與二十餘人置之法量移青陽調懷寧懷遠鳳陽擢知廣德調署滁六安州一任淮南書院掌教在滁最久清釐田賦積弊盡除復纂修滁州志捐俸刊行在六安值民教鬭爭祖詒直州民不袒教坐是落職再起署泗州宣統辛亥擢署鳳陽知府未上會鼎革引歸祖詒居官清介不干權要宦游數十載僅以牧令終未竟所用論者惜焉詩文閎博雅正不墜二熊先生矩矱著有東籬賸稿卒年六十有八

陸廷楨字幹甫瓦昭子吳江縣人累世居金澤清厲有才名事親孝篤友于嘗曰儒者志學首重齊家家之不齊國於何有年十八居父喪毀瘠盡禮光緒己丑舉於鄉壬辰成進士以知縣籤分河南兩充鄉試同考官乙未補商城未上調榮

澤廷楨起家寒峻習知閭閻疾苦下車之始省徭役清獄訟暮年民以大和庚子任商城商城接楚境民獷悍好訟不易治廷楨日坐堂皇判牘如流獄無留滯時拳禍方殷亂者四應縣之黃皮山故盜藪至是揭竿將犯城廷楨念綠營委靡請兵搜剿徒債事損威乃輕車簡從往喻禍福羣盜皆驚釋兵羅拜遂繫其元愆歸境內帖然商城人頌其功爲建生祠奉之壬寅署蘭儀癸卯調鎮平廷楨見國事日非度終不得報稱乃投檄自劾去家居沈默寂寥不與世接時作小詩舒晦卒年六十有三廷楨居官廉尚囊無羨貲爲商城時虧帑鉅無以償行絳吏議項城袁世凱知其清操首助之金監司以下繼之得免歲丙午其邑子有謁袁於京師者袁問廷楨安否備至且曰廷楨官豫中豫人比之清獻因嗟歎久之客

自豫中來者言豫人於廷楨之歸也雖甚久而謳思未已信夫德善所被民之不能忘也生平博覽經史尤精小學讀書恆至午夜著有說文考證經史析疑思耆齋詩文稿等俱藏於家

錢步瀛字曉洲歲貢生居錢盛村敦品勵學嚴於課徒光緒戊寅中州旱吳江凌淦邑人熊其英等將往振步瀛年弱冠卽奔走勸募不少後錢盛風俗窳敝步瀛日與農民講孝弟力田故事勉爲善良不聽則長揖之村人濡染久恥習偷惰俗爲之厚貧瘠之區漸成富庶時江北災民歲來騷擾步瀛爲述田家苦戒勿爾給饘粥謝而去步瀛歿旬日災民復至聞而歛歔因詣門拜曰此村禮讓成風吾儕亦當以禮報之其積誠感人如此

許啟琳字蓉汀增生居白鶴江爲人長者善排解董鎮事擘畫周至能染翰爲詩與汛尉吳興趙玉德交善時相唱和玉德歿松江差次爲經紀其喪復鳩貲校刊其遺稿辛亥後杜門謝事授徒以終著有慎餘詩文稿

李成仁字步洲張家角人業藍以信用著江淞間性慷慨好振匱乏宣統時嘗捐鉅金築校舍勸設六泉小學鄉僻之區得聞絃誦里人稱焉子元鼎之舉於鄉也先一日成仁趣家人備香案酒饌曰明日當有泥金報至果如其言或問之曰我教子嚴待師傅敬種瓜得瓜理也人服其質直卒年六十有九

黃封字少田黃家村人性友愛兄歿撫其子如己出邑東北鄉素產靛民資爲生自洋靛侵入遂日衰落宣統二年江督

端方開南洋勸業會於南京封采鄉人所製乾溼錠與賽得金牌獎然終不能振其業也董地方事甚久籌辦金湄瓶山兩小學堂具著勞勩

葉其驥字軼材廩貢生伉直有威音吐洪亮少孤貧苦志自勵授徒垂數十年門下甚盛光緒壬寅與張毓英張家鎮勦設願學學堂延聘名師課以經世有用之學爲邑中學校權輿地凡山川形勝邊徼要塞口講指畫瞭若掌紋著有江防海防邊防險要圖說都十四卷沿海各省島嶼攷二卷青浦鄉土志四卷

楊祖恩字柳山孝廉方正三俊從孫也居崧宅村性清約而勤事勿怠東鄉地形低窪恆虞靈潦祖恩勸民築圩或躬督青浦縣續志  
附編  
九  
之不辭勞瘁遇公益輒斥貲爲倡服務桑梓垂三十年奉公潔己歷任邑侯咸倚重之歿於民國七年年六十有七

跋

是志創修於民國六年初設籌備處擬具志目十有四子目附目若干始自光緒三年迄宣統三年止蓋承鄉先生熊氏其英之志而續其後以結束有清末季我邑三十餘年之文獻也翌年設局從事纂輯不數月載筆諸君先後離局各就家屬稿時局俶擾作輟靡定歷數歲未成十六年繼之補苴掇拾大體具矣顧束置之復四載於時良常于侯秉政我邑展布裕如取閱志稿慮其慢忽日久將失墜無徵也諮之縣政會議命詠榴終其事自審非所堪任請屬之戴君禹修沈君瘦東二君初不允必強詠榴參列其間而于侯復以志稿至不獲已乃即敝廬與二君共讀之則卷首圖說尚付缺如水利名宦傳列女傳完節表俱列諸志目中之子目或附目

青浦縣續志

跋

一

編輯且多未就食貨有志而其目無之人物志之才能傳雜傳與藝文志之集詩集文亦其子目所無而皆有其文因謂二君是志既續熊氏則纂修體例已具前志門目次第宜各因之今纂稿根諸擬目者復有交通實業二志夫交通之廣遠實業之繁夥莫如上海其續志初修時亦嘗分門纂入比及定稿卒皆捨棄之一仍前志則我續志之無庸自立體例別擬志目審矣雖然修志所重者究在事實事實具而體例出焉邑人士嘗爲詠榴言之原纂諸君寧不知此顧是志有不能無憾者光宣檔案先已不全邑中文物留遺籌備時哀集亦有未盡今欲如南匯續志之重事採訪徧搜案牘又不能需之以時則惟有折衷前志之體例先爲正其部居而後更及事實星野鄉保無變更原纂與兵制俱無稿隱逸名

不易副原纂亦無傳是皆宜從可無續徭役久罷於均田均役漕運海運可裁併爲一目其他如職官選舉各表依類相屬各從其便雖有異同無與體要始熊氏主纂吳江縣續志其體例壹遵乾隆時沈彤志而亦有不盡同者蓋或無可續或變爲之非乖前志例也今續先生重修之邑志正可資以爲法二君皆然之乃本是旨重爲編纂刪裁竄易不自量度亦或追憶舊聞旁搜傳記與夫友朋稱述之故事有足傳信於後者皆兼收而並著之俾爲是志壤流之助詠榴學殖荒落略貢編次大意懷鉛提槧皆二君力也書成都凡二十四卷又附編人物原纂散列本志各傳後似不甚當因另編一卷殿之間增數人仍斷自沒於民國七年以前者蓋皆徵訪時所遺者也追念是志之修發端於款產處蔡君吉人其後

兩次圖成則皆繼任莊君有圻之力詠榴自二十年七月始與此役甫及半載而有倭寇之警風鶴驚心亦幾中輟遲之又久至二十二年十二月告竣而莊蔡兩君相繼謝世已不及見矣其先與修是志者如吳君業韓沈君商耆輩前後凡二十八人零落亦且及半城郭猶是人民已非俯仰變遷今昔同感寫稿旣畢行授剞劂撮舉顛末並咎疏略乘舛無以贖邑人士之望云二十三年六月金詠榴謹識